

CYNGOR CYMUNED LLANBERIS

COFNODION CYFARFOD MIS GORFFENNAF 2022:

1 CROESO:

Cofnodion cyfarfod misol rheolaidd y Cyngor nos Fercher y 13eg o Orffennaf am 7yh yn Y Ganolfan, Llanberis. Estynwyd croeso i'r aelodau gan y Cadeirydd.

2 PRESENNOL ac YMDDIHEURIADAU:

Ward Padarn: Rhys ap Gwilym, Emlyn Baylis, Gwilym Evans, Heather L Jones, Kevin Morris Jones, Cyng. Kim Jones, Nia Jones, Louise Price, Helen Sharp, Trystan Thomas.

Ward Peris: Iola Owen, Llinos Haf Pritchard (Cadeirydd).

Ymddiheuriadau: Iwan Harding.

Hefyd yn bresennol: Dei Tomos (Clerc).

3 DATGAN BUDDIANT:

Cofnodir, os yn berthnasol, o dan y gwahanol benawdau.

4 CADARNHAU COFNODION:

Cadarnhawyd cofnodion cyfarfod nos Fercher yr 8fed o Fehefin, 2022 fel rhai cywir ac fe'i llofnodwyd gan y Cadeirydd. Cynnig ac eilio: HLJ / RhaG

5 MATERION YN CODI O'R COFNODION:

1. Cysgodfan Bws:

Yr arian am godi'r gysgodfan newydd yn dal heb ei dderbyn er fod y ffurflen wedi ei llenwi.

2. National Grid - Gwaith Ffordd:

Adroddodd KJ ac EB iddynt ar adegau gwahanol drafod sefyllfa'r gwaith gyda *nationalgrid*. Cafwyd ar ddeall na fydd y fynedfa orllewinol o Ffordd Osgoi Llanberis i'r pentref yn cael ei chau yn gyfangwbl pan fydd angen agor ar ei thraws. Mae amserlen y cwmni'n dal yn aneglur a pawb yn methu deall pam na wneir y gwaith ar draws y caeau rwan a hithau'n sych. Cafwyd ar ddeall (wedyn) y bydd peth o'r gwaith yn symud i ochr isaf Garej Beran.

3. Mainc y Fynwent:

Gorffenwyd y gwaith o dynnu'r fainc a fe'i cyflwynwyd i Eglwys Nantperis. Chafwyd dim dyddiad pryd y derbynir y fainc newydd 'er cof'.

4. Cae'r Ddôl a Defaid:

Amharod ydi CG i osod giat yn lle'r un a dynnwyd wrth fynedfa Cae'r Ddôl oherwydd cwynion gan berson anabl a does yna fawr o obaith chwaith cael caniatad i greu corlan i ddal y defaid crwydrol chwaith.

5. Trafnidiaeth a phlant ysgol:

Yn dilyn cynnig cydweithio gyda Ysgol Dolbadarn i geisio cynyddu diogelwch plant ar y ffordd i'r ysgol ar Lôn Ty Du a Ffordd Capel Coch cafwyd ymateb gan yr ysgol. Dywedodd y prifathro ei fod yn diolch am ein e-bost ac y byddai'r ysgol yn sicr o atgoffa rhieni ar ddechrau Medi. Ychwanegodd 'Mae'n rhywbeth rydym yn gorfod eu hatgoffa yn rheolaidd o ddiogelwch ar waelod y ffordd'. Awgrymwyd cysylltu eto ar ddechrau tymor yr Hydref.

6. Ci Peryglus:

Mewn ymateb i ymholiad y Clerc a Swyddog Cefn Gwlad o Heddlu Gogledd Cymru (HGC) am gi yn ymosod ar oen cafwyd ar ddeall mai dim ond lle y mae hynny yn digwydd ar dir amaethyddol y mae modd erlyn perchennog y ci. Gan fod yr achos dan sylw wedi bod ar y stryd, doedd dim y medrai'r heddlu ei wneud. Adroddwyd fod HGC yn ymwybodol o hanes y ci. Awgrymwyd ysgrifennu at y perchennog ar ran y Cyngor i son fod pryder lleol am ymddygiad y ci.

7. Agor toiledau:

Adroddwyd fod y trefniant i agor y toiledau bob yn ail Sadwrn a Sul yn gweithio'n dda. Diolchwyd i'r rhai fu wrthi.

8. Clwb Ieuenctid:

Mae'n amlwg o gyllideb y Cyngor na oes modd cefnogi'r bwriad gan Gyngor Gwynedd (CG) i agor Clwb Ieuenctid yn Llanberis yn yr Hydref. Roedd y cais, nad oedd wedi dod yn uniongyrchol i'r Cyngor hwn, yn un llawer rhy hwyr i'w gynnwys yn y gyllideb bresennol ac mae'n ymddangos nad oes gan CG unrhyw fwriad i neilltuo unrhyw arian i gynnal y Clwb. Byddai'r baich yn disgyn ar y gymuned leol. Codwyd cwestiwn yn holi a oedd digon o ddiddordeb a digon o aelodau i gynnal Clwb o gofio fod rhai o ieuenctid yr ardal eisioes yn mynd i glwb Llanrug. Crybwyllwyd y gallai pwyllgor Y Ganolfan o bosib gynorthwyo, a gofynnwyd tybed a fyddai modd i'r pwyllgor ystyried hynny.

9. Dolbadarn:

Cafwyd adroddiad gan KJ a oedd mewn cysylltiad a'r awdurdodau perthnasol fod gwell trefn yn Nolbadarn erbyn hyn a'r gwasanaethau cymdeithasol mewn cysylltiad cyson.

10. Llythyr Llanrug:

Roedd y Clerc yn obeithiol y gellid cynnal cyfarfod gyda'r ddau Gyngor arall i drafod cynnwys y llythyr yn mis Medi.

6 MATERION ERAILL:

1. Hen lyfrgell Llanberis:

Cafwyd ar ddeall trwy KJ fod bwriad gan CG i adeiladu tri thŷ ar safle'r hen lyfrgell. Mynegwyd peth pryder am drafnidiaeth a faint o lefydd parcio fyddai ar gael. Dywedodd KJ ei bod am ofyn i CG ymgynghori yn lleol gyd trigolion Ffordd Capel Coch cyn bwrw 'mlaen a'r cynllun. Cefnogwyd hynny.

2. Y Glyn:

Mae'n wybyddys bellach fod CG yn bwriadu gwella safle'r Glyn ar lan llyn Padarn. Bu'r Cyngor hwn yn pwysu ers blynyddoedd am ddatblygu'r safle gan fynnu bod angen rhoi wyneb ar y meysydd parcio a chodi tâl am barcio. Bellach cafodd y Cyngor nifer o grantiau i'w gynorthwyo i wneud y gwaith. Un o Gronfa Y Pethau Pwysig. Mae'n debyg mai maes o law wedi cwblhau'r gwaith yma y bydd rhaid talu am barcio. Bryd hynny dylid mynnu ystyriaeth i bobl leol gael parcio am ddim neu yn rhatach.

3. Cae Fron-deg:

Roedd sibrydion wedi bod yn lleol fod bwriad gan rywun i greu rhandiroedd gardd ar dir y cae. Ers blynyddoedd lawer mae'r Cyngor hwn wedi gofalu am y cae gan dorri'r gwair yn gyson, o leiaf dair gwaith y tymor a rhai blynyddoedd yn ôl gosodwyd ffens hefyd ar ddwy ochr y cae i atal peli'r plant rhag mynd i'r gerddi islaw. Bu ymdrech dro'n ôl i ddarganfod pwy oedd y perchennog ond i ddim diben, awgrymwyd ymdrech arall gan ddefnyddio cyfreithiwr y tro hwn ac o bosib profi ei fod yn eiddo'r Cyngor hwn oherwydd blynyddoedd o ddefnydd. Cynnig ac eilio: HLJ / RhaG.

4. Cae'r Ddôl:

Adroddwyd ei bod yn ymddangos fod symud digwyddiadau a rاسus mawr o Gae'r Ddôl i'r safle newydd yn gweithio. Wedi peth trafferthion ar gyfer y ras gynta mae pethau bellach yn rhedeg yn esmwyth. Mae'r prif gae'n cael ei arbed a'r swm a'r symud ymhellach oddi wrth y tai yn Maes Padarn. Cafwyd adolygiad ar ôl y digwyddiad cyntaf gyda KJ, EB a'r Clerc yn bresennol a bu KJ a'r Clerc yn edrych ar y cae cyn dechrau'r ail ddiwyddiad a chael ar ddeall fod pethau'n rhedeg yn rhwydd a'r cae wedi ei baratoi yn addas.

5. Cae Chwarae, Ger y Llyn:

Cafwyd nifer o esiamplau a phrisiau o offer addas i blant bach ar gyfer y cae chwarae a phenderfynwyd yn unfrydol i brynu offer gan gwmni GLJ, Bethesda.

7 GOHEBIAETH:

1. CG - Ardal Ni 2035:

Llythyr yn nodi fod bwriad i gynnal cyfarfod i drafod yr arolwg a gynhaliwyd yn gynharach eleni, ynglyn a dymuniadau pobl ar gyfer dyfodol eu cymunedau, rhywbryd tua diwedd Medi. Dyma ran o Fframwaith Adfywio Gwynedd.

2. Llythyr MB:

Derbyniwyd llythyr oddi wrth un o drigolion y pentref yn pwysu ar yr aelodau i fod yn ymwybodol o'r llanast a'r budreddi sydd yn aml ger y Y Glyn a'r pyllau ar lan y llyn. Roedd y llythyr yn mynnu nad oes gan bobl, yn lleol ac yn ymwelwyr ddim parch tuag at y pentref a'r ardal ac roedd yn teimlo nad oedd digon o ofal gan y cyhoedd na'r awdurdodau o'r amgylchedd. Roedd yn pwysu fod angen i'r Cyngor fod yn fwy gweithredol. Mewn ymateb dywedwyd fod y Cyngor hwn yn ymwybodol o'r problemau ac yn ceisio ymateb i bob cwyn a digwyddiad.

3. CG - Ras yr Wyddfa:

Roedd manylion am gau ffyrdd adeg y ras wedi dod i law. Ar y ffurflen roedd son am gau am nifer o oriau. Pan gysylltodd y Clerc a'r Cyngor dywedwyd mai dim ond adlewyrchu y cais yr oedd y gorchymyn. Darganfuwyd wedyn fod y trefnydd y ras wedi gwneud camgymeriad, ac roedd wedi syrthio ar ei fai. Newidiwyd y gorchymyn i adlewyrchu hynny, ond roedd y Clerc yn siomedig nad oedd swyddogion Cyngor Gwynedd yn ystyried yn fanwl y ceisiadau, yn enwedig pan mae cais i gau'r ffyrdd am oriau hir. Mae trigolion yr ardal wedi cael mwy na'u siar o drafferthion trafnidiaeth eleni gyda gosod dwythellau ar gyfer y llinell drydan o dan yr A4086 rhwng Llanberis a Phenllyn.

8 CYNLLUNIO:

- **C22/0529/15/DT** - Cil Melyn, 8 Stryd Warden, Llanberis - *trosi to fflat yn deras to. Ffenestr gefn llawr cyntaf i'w thrawsnewid yn ddrws i ganiatau mynediad a rhwystr o amgylch peromedr y to fflat + decin ar y llaw.*
Ymateb: Wedi trafodaeth penderfynwyd yn unfrydol y dylid gwrthod y cais yma am y gallai y datblygiad hwn ymyrryd a phreifatrwydd cymdogion.

- **C22/0565/15/LL** - V12 Outdoor, Stryd Fawr, Llanberis - *trosi llofft presennol yn fflat hunangynhaliol gan gynnwys balconi ac estyniad i gefn yr adeilad.*

Ymateb: Wedi trafodaeth penderfynwyd fod peth pryder ynglyn a'r cais hwn, yn benodol am breifatrwydd tai cyfagos o'r balconi arfaethedig. Hefyd holwyd a oedd yna le parcio ar gyfer y llety ychwanegol yr oedd cais yma am ei greu.

Cynnig ac eilio: TT / LIHP; RhaG / TT

9 MATERION ARIANNOL:

1) Yn y Banc ar yr 28ain o Fehefin, 2022

Cyfrif Cyfredol: £36,797.61 Cyfrif Cadw: £66.52

2) Cadarnhawyd y taliadau canlynol:

CYFANSWM £2,279.64

3) Arian a dderbyniwyd rhwng 29/05/2022 a 28/06/2022:

CYFANSWM £3,685.00

Cynnig ac eilio yr oll o'r materion ariannol: TT / RhaG.

10 CYFARFOD NESAF:

Dyddiad y cyfarfod nesaf. Nos Fercher y 14eg o Fedi, 2022 am 7.00yh yn Y Ganolfan.

Arwyddwyd a chafwyd yn gywir:

Cadeirydd: Llinos Haf Pritchard

Clerc: Dei Tomos

Dyddiad: 14eg o Fedi, 2022